

Tillaga skóla- og frístundaráðsfulltrúa Samfylkingarinnar, Viðreisnar, Pírata og Vinstri grænna varðandi reglur um strætókort til nemenda í grunnskólum:

Skóla- og frístundaráð samþykkir að ákvörðun ráðsins frá 25. júní 2019 þar sem samþykktar voru nýjar reglur um strætókort til nemenda í grunnskólum Reykjavíkurborgar og breytingar á reglum um skólahverfi, umsókn og innritun í grunnskóla Reykjavíkurborgar verði endurupptekin og málinu vísað að nýju til umsagnar foreldrafélaga þeirra skóla sem breyting mun hafa áhrif á. Frestur til að senda inn umsagnir verði veittur til 15. september 2019. Ráðið mun taka málið til efnislegrar meðferðar að nýju að loknu umsagnarferli.

Greinargerð:

Á 163. fundi skóla- og frístundaráðs þann 25. júní 2019 samþykktu skóla- og frístundaráðsfulltrúar Samfylkingarinnar, Viðreisnar, Pírata og Vinstri grænna og vísaði til borgarráðs nýjum reglum um strætókort til nemenda í grunnskólum Reykjavíkurborgar sem búa í meira en 1,5 km. göngufjarlægð frá hverfisskóla sínum miðað við örugga gönguleið frá heimili að skólalóð. Jafnframt skyldu falla úr gildi reglur um afhendingu farmiða til nemenda í grunnskólum borgarinnar, samþykktar í menntaráði 3. nóvember 2005.

Þessu samfara var samþykkt að gera breytingar á 6. gr. reglna um skólahverfi, umsókn og innritun í grunnskóla Reykjavíkurborgar, með þeim hætti að fram komi að þeir nemendur með lögheimili í Reykjavík sem eiga þess kost að fá ókeypis strætókort eru nemendur í 1.-10. bekk sem búa (eiga lögheimili) í meira en 1,5 km göngufjarlægð frá hverfisskóla sínum, til samræmis við reglur um strætókort til nemenda í grunnskólum Reykjavíkurborgar.

Breytingarnar áttu að taka gildi 22. ágúst 2019. Þó áttu nýjar reglur ekki taka gildi fyrr en 1. janúar 2020 fyrir nemendur í 1.-4. bekk Hlíðaskóla með lögheimili í Suðurhlíðum og nemendur í 1.-4. bekk Melaskóla með lögheimili í Skerjafirði.

Í minnisblaði sviðsstjóra skóla- og frístundasviðs, dags. 21. júní 2019, sem lagt var fram á 163. fundi skóla- og frístundaráðs er þess getið að ekki hafi borist umsagnir tveggja skólaráða en þær hafa nú borist.

Með vísan til þess að það láðist að gefa foreldrafélögum þeirra skóla sem málið varðar kost á að koma á framfæri umsögn er málið lagt fyrir skóla- og frístundaráð að nýju. Foreldrafélögum þeirra skóla sem málið varðar verður gefinn kostur á því að senda inn umsagnir um málið. Frestur til að senda inn umsagnir verður til 15. september 2019 og mun skóla- og frístundaráð taka málið til efnislegrar meðferðar að nýju að því loknu.



Minnisblað

Reykjavík, 21. júní 2019
SFS2018110156
163. fundur
HG/geb/hs

Til: skóla- og frístundaráðs

Frá: Helga Grímssyni, sviðsstjóra skóla- og frístundasviðs

Efni: Tillaga að breytingum á reglum um afhendingu farmiða til nemenda í grunnskólum borgarinnar og akstur nemenda með hópþifreiðum og tillaga að breytingum á reglum um skólahverfi, umsókn og innritun í grunnskóla Reykjavíkurborgar

I Forsaga málsins

Á 148. fundi skóla- og frístundaráðs þann 27. nóvember 2018 varð lögð fram tillaga sviðsstjóra skóla- og frístundasviðs, dags. 23. nóvember 2018, að breytingum á reglum um afhendingu strætómiða/korta fyrir nemendur í grunnskólum Reykjavíkur. Fram kom að skrifstofa skóla- og frístundasviðs legði til að reglurnar yrðu einfaldaðar þannig að sama viðmið um fjarlægð yrði notað um alla aldurshópa nemenda, þ.e. 1,5 km fjarlægð frá heimili að heimaskóla. Þá verði hætt að afhenda miða heldur fái nemendur árskort í strætó skráð á nafn viðkomandi barns og nýtist allan daginn alla daga ársins.

Á fundinum var samþykkt málsmeðferðartillaga sem kvað á um að breyting á reglum um afhendingu strætómiða/korta fyrir nemendur í grunnskólum Reykjavíkur verði send til umsagnar skólaráða og foreldrafélaga þeirra skóla sem málið varðar.

Með vísan til framangreinds gilda um skólaakstur í grunnskólum Reykjavíkurborgar reglur um afhendingu farmiða til nemenda í grunnskólum borgarinnar með strætisvögnum Reykjavíkur og akstur nemenda með hópþifreiðum, samþykktar í Menntaráði þann 3. nóvember 2005.

Jafnframt er í reglum um skólahverfi, umsókn og innritun í grunnskóla Reykjavíkurborgar, 6. gr., tekið fram hverjir eigi rétt á skólaakstri/strætófargjaldi en reglurnar voru samþykktar í skóla- og frístundaráði þann 8. febrúar 2017 og í borgarráði þann 9. febrúar 2017.

Samkvæmt 1. gr. núgildandi reglna um afhendingu farmiða til nemenda í grunnskólum borgarinnar eiga nemendur sem sækja skóla í sínu skólahverfi kost á að fá ókeypis farmiða sé vegalengdin frá heimili að skóla meiri en 1,5 km fyrir nemendur í 1.-5. bekk og 2 km fyrir nemendur í 6.-10. bekk. Miðað er við skemmstu gönguleið. Sama regla kemur fram í 6. gr. reglna um skólahverfi, umsókn og innritun í grunnskóla Reykjavíkurborgar.

Með vísan til minnisblaðs sviðsstjóra skóla- og frístundasviðs, dags. 23. nóvember 2018, er lagt til að reglur verði einfaldaðar þannig að sama viðmið um fjarlægð verði notað fyrir alla aldurshópa nemenda, þ.e. 1,5 km. fjarlægð frá lögheimili að heimaskóla. Þá verði meginreglan sú að hætt verði að afhenda miða heldur fái nemendur árskort í strætó skráð á nafn viðkomandi barns og nýtist allan daginn alla daga ársins.

Í tengslum við framangreinda breytingu er lagt til að í stað núgildandi reglna komi nýjar reglur til samræmis við meðfylgjandi drög í þeim tilgangi að orðalag verði fært til dagsins í dag og reglurnar

almennt einfaldaðar. Reglurnar fá m.a. nýtt nafn eða reglur um strætókort til nemenda í grunnskólum Reykjavíkurborgar. Þá er nauðsynlegt að gera breytingar á 6. gr. reglna um skólahverfi, umsókn og innritun í grunnskóla Reykjavíkurborgar. Nánari umfjöllun um breytingar á reglunum má sjá undir lið III.

II Umsagnir skólaráða og viðbrögð skóla- og frístundasviðs við umsögnum

Ákveðið var að óska eftir umsögnum um drög að nýjum reglum frá skólaráðum þeirra skóla sem breytingarnar gætu haft áhrif á og bárust umsagnir frá sjö af þeim níu skólum sem boðið var að senda umsögn.

Skólaráð **Hagaskóla** og **Laugarnesskóla** gera ekki athugasemdir við tillögurnar. Ekki bárust umsagnir frá **Kelduskóla** og **Melaskóla**.

Skólasamfélag **Árbæjarskóla** telur að með nýjum reglum sé einungis verið að færa til afhendingu strætómiða eða –korta á milli hverfa, þannig að hluti nemenda úr Ártúnshverfi missi gjaldfrjáls afnot af strætó og í stað þess fá fleiri nemendur í Seláshverfi gjaldfrjáls afnot af strætó. Skólasamfélag Árbæjarskóla hvetur skóla- og frístundasvið til að endurskoða reglurnar þannig að allir nemendur í unglingadeild skólans með lögheimili í Ártúns- og Seláshverfum eigi rétt á strætókorti og leggur jafnframt til að öllum grunnskólanemendum borgarinnar verði boðið að ferðast endurgjaldslaust í strætó.

Til skýringa tekur skrifstofa skóla- og frístundasviðs fram að með tillögu að breytingum á reglum varðandi skólaakstur verður til það viðmið að nemendur sem eiga undir 1500m. gang að skólalóð gangi í skólann. Í Ártúnsholti eru nemendur með frá 1,1-2,1km. gang að skólalóð. Ef strætisvagnasamgöngur eru það góðar að það spari tíma að taka strætisvagn fyrir undir 1500m. göngu er það auðvitað jákvætt en þá er það á eigin kostnað eins og í öðrum hverfum í Reykjavík. Það sama á við í skólahverfi Selásskóla en þar eru gönguleiðir frá undir 700m og allt að 2,1 km. Ef allir sem ættu 700m. gang í skólann fengu strætókort þá væri breyting á reglunum mun kostnaðarsamari.

Á það er bent að markmiðið með breytingum á reglunum er að auka jafnræði og gagnsæi við úthlutun strætómiða/-korta og að sömu reglur gildi fyrir alla nemendur.

Skólaráð **Foldaskóla** leggur til að allir nemendur í grunnskólum borgarinnar fái til afnota strætókort sér að kostnaðarlausu.

Skrifstofa skóla- og frístundasviðs áætla að árlegur kostnaður við að allir nemendur í grunnskólum borgarinnar fái til afnota strætókort yrði um 226,8 millj. kr.

Skólaráð **Fossvogsskóla** bendir á að nemendur sem eru í sameiginlegri forsjá foreldra sem skilin eru að skiptum og eigi tvö heimili þar sem annað er utan skólahverfis sitji ekki við sama borð og aðrir nemendur í grunnskólum borgarinnar. Einnig leggur skólaráð Fossvogsskóla til að ákvörðun SFS um framkvæmd skólaaksturs liggi fyrir ekki síðar en 1. júlí vegna komandi skólaárs til að skólastjórnendur hafi ráðrúm til að skipuleggja og semja um skólaakstur vegna komandi skólaárs.

Skólaráð **Hlíðaskóla** mótmælir fyrirhugaðri breytingu á skólaakstri í hverfi 105. Fram kemur að skólaráðið hafi upplýsingar um að skóla- og frístundasvið hafi til skoðunar að leggja niður akstur nemenda með hópþingum og ætli að taka upp reglur um strætókort. Jafnframt telur skólaráðið að fyrirhugaðar breytingar á reglum um skólaakstur sé óásættanlegur fyrir þá nemendur sem búa í Suðurhlíðum sem þyrftu að ganga erfiða og illa upplýsta gönguleið í skóla og að viðmið um vegalengd eigi illa við um þetta hverfi. Fyrirhugaðar breytingar myndu auka umferð einkabíla um hverfið og skapa umferðaröngþveiti við skólann. Umsögninni fylgdi undirskriftarlisti með nöfnum 24 íbúa í Suðurhlíðum sem mótmæla fyrirhugaðri breytingu á skólaakstri í hverfinu.

Vegna framangreinds upplýsir skrifstofa skóla- og frístundasviðs um að nemendur í 1. – 4. bekk Hlíðaskóla með lögheimili í Suðurhlíðum hafa fram að þessu fengið skólaakstur með hópþingum að morgni dags á kostnað skrifstofu skóla- og frístundasviðs. Eftir að könnun var gerð á nýtingu aksturs síðdegis var hann lagður af. Gera má ráð fyrir að ef nýjar reglur verði samþykktar verði skólaakstri í þessum hluta skólahverfis Hlíðaskóla að morgni hætt.

Samkvæmt upplýsingum sem skrifstofa skóla- og frístundasviðs hefur aflað er gönguleið nemenda með lögheimili í Suðurhlíðum á bilinu 815 – 1.390 m. og því átti enginn nemandi í 1. – 4. bekk Hlíðaskóla

sl. skólaár með lögheimili í Suðurhlíðum rétt á strætókorti miðað við breyttar reglur um afhendingu strætókorta til nemenda í grunnskólum borgarinnar. Skóla- og frístundasvið tekur undir ábendingu um að ekki sé hentugt fyrir nemendur í Suðurhlíðum að taka strætó í Hlíðaskóla.

Tekið er fram að það er mat skrifstofu skóla- og frístundasviðs að gönguleiðin sé ekki erfiðari en gengur og gerist í borginni. Að mestu er gengið á göngustíg eða meðfram götu með 30 km hámarks hraða þar sem mikið er af hraðahindrunum og svo er farið um undirgöng, yfir ein ljós um hjólastíg og yfir göngubraut við grunnskólann.

Skólaráð **Réttarholtsskóla** gerir athugasemd við að nemendur sem sækja skóla utan skólahverfis af vel rökstuddum ástæðum eigi ekki kost á gjaldfrjálsu strætókorti sem feli í sér mismunun milli nemenda eftir búsetu.

Hvað varðar athugasemdir í umsögnum um að nemendur í Réttarholtsskóla búi í einhverjum tilfellum fjarri skólanum og að börn búi sum hver á tveim heimilum þá er við það miðað að til samræmis við reglur um skólahverfi, umókn og innritun í grunnskóla Reykjavíkurborgar ráði lögheimili því hver hverfisskóli nemandans er.

III Nýjar reglur um strætókort til nemenda í grunnskólum Reykjavíkurborgar og breyting á reglum um skólahverfi, umsókn og innritun í grunnskóla Reykjavíkur

a) Reglur um strætókort til nemenda í grunnskólum Reykjavíkurborgar

Helstu breytingar eru eftirfarandi:

Nafni reglnanna verður breytt úr reglum um afhendingu strætómiða/korta fyrir nemendur í grunnskólum borgarinnar með strætisvögnum Reykjavíkur og akstur nemenda með hópþifreiðum í reglur um um strætókort til nemenda í grunnskólum Reykjavíkurborgar.

Í upphafi nýrra reglna koma fram upplýsingar um gildissvið þeirra til samræmis við texta í reglum um skólahverfi, umsókn og innritun í grunnskóla Reykjavíkurborgar auk tilvísunar til þeirra reglna.

Með nýjum reglum eiga nemendur sem sækja skóla í sínu skólahverfi, til samræmis við reglur um skólahverfi, umsókn og innritun í grunnskóla Reykjavíkurborgar, kost að fá ókeypis strætókort sé vegalengdin frá heimili að skóla meiri en 1,5 km. Miðað er við örugga gönguleið frá heimili að skólalóð samkvæmt skilgreiningu Borgarvefsjár.

Í núgildandi reglum er miðað við að heimilt sé að afhenda ókeypis farmiða ef vegalengdin er meiri en 1,5 km fyrir nemendur í 1. til 5. bekk en 2 km fyrir nemendur í 6. til 10. bekk.

Óbreytt er að nemendur sem að tilstuðlan skóla- og frístundasviðs sækja skóla utan skólahverfi eiga kost á að fá ókeypis strætókort/farmiða.

Felld er á brott heimild til að afhenda nemendum strætómiða sem flust hafa á milli skólahverfa en óska eftir að sækja sinn fyrri skóla út yfirstandi skólaár, ókeypis farmiða að hálfu.

Gerð er sú breyting að skóla- og frístundaráð tekur ákvörðun um akstur með hópþifreiðum fyrir 1. júlí vegna komandi skólaárs.

Að öðru leyti er vísað til meðfylgjandi draga að reglum um strætókort til nemenda í grunnskólum Reykjavíkurborgar.

b) Reglur um skólahverfi, umsókn og innritun í grunnskóla Reykjavíkurborgar

Ákvæði 6. gr. er svohljóðandi:

6. gr. Skólaakstur/strætófangjald

Þeir nemendur með lögheimili í Reykjavík sem eiga rétt á skólaakstri/strætófangjaldi eru:
Nemendur í 1.-5. bekk sem búa meira en 1,5 km göngufjarlægð frá hverfissskóla sínum.
Nemendur í 6.-10. bekk sem búa meira en 2 km göngufjarlægð frá hverfissskóla sínum.

Lagt er til að gerð verði breyting á 6. gr. og ákvæðið hljóði svo:

6. gr. Strætókort

Þeir nemendur með lögheimili í Reykjavík sem eiga þess kost að fá ókeypis strætókort eru nemendur í 1.-10. bekk sem búa (eiga lögheimili) í meira en 1,5 km göngufjarlægð frá hverfissskóla sínum, til samræmis við reglur um strætókort til nemenda í grunnskólum Reykjavíkurborgar.

IV Upplýsingar um fjárhagslega áhrif

Þegar skoðaðar voru fjarlægðir frá heimili að heimaskóla í öllum skólahverfum borgarinnar kom í ljós að gera mætti breytingar í tólf skólahverfum:

Árbæjarskóli: Með því að afhenda nemendum sem búa utan við 1,5 km. radíus frá skólanum strætókort og hætta að afhenda farmiða til nemenda í þeim hluta skólahverfisins sem lendir innan 1,5 km. viðmiðs dregst kostnaður saman um **2,2 millj. kr.**

Fossvogsskóli: Um 20 nemendur eiga rétt á strætókorti og kostnaður eykst um **kr. 215.800.**

Foldaskóli: 11 nemendur í Hamrahverfi eiga rétt á strætókorti og er kostnaður við það **kr. 238.700.**

Hagaskóli: Um 35 nemendur eiga rétt á strætókorti og er kostnaður við það **kr. 1.410.500.**

Háaleitisskóli: Einn nemandi á rétt á strætókorti og eykst kostnaður um **kr. 21.700**

Hlíðaskóli: Nemendur búsettir í Suðurhlíðum sem hefur verið ekið í skólann með rútu fá strætókort og sparast við það **1,2 millj.**

Kelduskóli: Nemendur í unglingsdeild sem búsettir eru í Staðarhverfi fá strætókort í stað þess að vera ekið með rútu í og úr skóla. Ókostur við þessa leið er að nemendur þurfa að skipta um vagn við Egilshöll. Kostnaður dregst saman um allt að **kr. 5.035.800.**

Langholtsskóli: Einn nemandi býr nú utan viðmiðs um fjarlægð frá heimaskóla ættu rétt á strætókorti, kostnaður **kr. 30.300.**

Laugalækjarskóli: Átta nemendur sem búa utan viðmiðs um fjarlægð ættu rétt á strætókorti, kostnaður **kr. 173.600.**

Laugarnesskóli: 17 nemendur sem búa utan viðmiðs um fjarlægð frá heimaskóla ættu rétt á strætókorti, kostnaður **kr. 185.500.**

Melaskóli: Nemendum sem búa í Litla og Stóra Skerjafirði er ekið í og úr skóla með tveim rútum. Með því að þessir nemendur fengu strætókort , ef þeir búa í meira en 1,5 km frá skóla, má draga úr kostnaði um **8,8 millj. kr.**

Réttarholtsskóli: 12 nemendur búa utan viðmiðs um fjarlægð frá heimaskóla, kostnaður **kr. 260.400.**

Með því að einfalda reglur um úthlutun stætómiða og afhenda þeim nemendum strætókort sem búa utan við 1,5 km. göngufjarlægðar frá heimaskóla, og leggja af akstur með rútum í skólahverfi Hlíðaskóla, Kelduskóla – Vík og Melaskóla má draga úr kostnaði sem nemur allt að **16,0 millj. kr.** á ári. Nemendur á unglingastigi í Kelduskóla – Vík yrðu þá að skipta um vagn í Egilshöll, nemendur í 1. – 7. bekk Melaskóla að ganga yfir Suðurgötuna sem er þung umferðargata og nemendur í 1. – 4. bekk Hlíðaskóla sem búsettir eru í Suðurhlíðum geta aðeins tekið strætó lítinn hluta leiðar sinnar í Hlíðaskóla eða sem nemur vegalengd milli stoppistöð við Veðurstofuna og að næstu stoppistöð. Lagt er til að reglur þessar taki gildi við upphaf skólaárs haustið 2019.

Yfirlit yfir þau skólahverfi sem tillaga um breytingu á afhendingu strætómiða/-korta myndi ná til og mismun á kostnaði:

Skóli	Rútuakstur Kostnaður á ári	Strætómiðar kostnaður	Kostnaður á nemanda	Fjöldi yngri	Fjöldi eldri	Kostnaður strætókort	Mismunur
Kelduskóli	5.600.000 ISK		94.915 ISK		26	564.200 ISK	5.035.800 ISK
Hlíðaskóli	1.200.000 ISK		80.000 ISK	0		- ISK	1.200.000 ISK
Melaskóli	9.300.000 ISK		88.571 ISK	45	9	582.300 ISK	8.717.700 ISK
Hagaskóli		1.406.550 ISK	55.440 ISK		65	1.410.500 ISK	- 3.950 ISK
Árbæjarskóli		3.169.800 ISK	55.440 ISK		45	976.500 ISK	2.193.300 ISK
Langholtsskóli				1	1	30.300 ISK	- 30.300 ISK
Laugalækjarskóli					8	173.600 ISK	- 173.600 ISK
Laugarnesskóli				14	3	185.500 ISK	- 185.500 ISK
Réttarholtsskóli					12	260.400 ISK	- 260.400 ISK
Fossvogsskóli				15	4	215.800 ISK	- 215.800 ISK
Foldaskóli					11	238.700 ISK	- 238.700 ISK
Háaleitsskóli					1	21.700 ISK	- 21.700 ISK
Samtals	16.100.000 ISK	4.576.350 ISK		75	185	4.659.500 ISK	16.016.850 ISK

REGLUR um strætókort til nemenda í grunnskólum Reykjavíkurborgar

Gildissvið

Reglur þessar gilda um umsókn og afhendingu strætókorta/farmiða til nemenda í grunnskólum Reykjavíkurborgar og reglubundinn skólaakstur þegar hann á við. Samkvæmt lögum um grunnskóla nr. 91/2008 er sveitarfélögum skylt að sjá til þess að skólaskyld börn sem eiga lögheimili í sveitarfélaginu, og börn sem hefur verið ráðstafað í fóstur til fósturforeldra, sem eiga lögheimili í sveitarfélaginu, njóti skólavistar eftir því sem nánar segir í grunnskólalögum. Samkvæmt 22. gr. grunnskólalaga bera sveitarfélög ábyrgð á skipulagi skólaaksturs þar sem hann á við og standa straum af kostnaðinum.

Í reglum um skólahverfi, umsókn og innritun í grunnskóla Reykjavíkurborgar er kveðið á um skólahverfin, reglurnar má sjá hér:

https://reykjavik.is/sites/default/files/skjol_thjonustulysingar/113_5.2_reglur_um_skolahverfi_og_innritun.pdf

Foreldri er hér notað yfir þá sem fara með forsjá barns skv. barnalögum.

1. gr. Skilyrði fyrir afhendingu strætókorta/farmiða

1.1 Nemendur sem sækja skóla í sínu skólahverfi, til samræmis við reglur um skólahverfi, umsókn og innritun í grunnskóla Reykjavíkurborgar eiga þess kost að fá ókeypis strætókort sé vegalengdin frá heimili að skóla meiri en 1,5 km. Miðað er við örugga gönguleið frá heimili að skólalóð samkvæmt skilgreiningu Borgarvefsjár.

Þeir nemendur sem þurfa tímabundið eða 1 – 2 daga í viku að nota almenningssamgöngur til að komast til og frá skóla fá ókeypis farmiða sé vegalengdin frá lögheimili að skóla meiri en 1,5 km. Miðað er við örugga gönguleið frá lögheimili að skólalóð samkvæmt skilgreiningu Borgarvefsjár.

1.2 Nemendur sem að tilstuðlan skrifstofu skóla- og frístundasviðs sækja skóla utan skólahverfis eiga þess einnig kost að fá ókeypis strætókort/farmiða og skulu viðmiðunarmörk um vegalengd vera hin sömu, þ.e. fjarlægð frá lögheimili að skóla er meiri en 1,5 km.

1.3 Nemendur sem samkvæmt ákvörðun foreldra sækja skóla utan síns skólahverfis eiga ekki rétt á ókeypis strætókorti/farmiðum.

2. gr. Umsókn um strætókort

2.1 Foreldrar sækja árlega um strætókort/farmiða til viðkomandi skóla á þar til gerðu eyðublaði. Skólinn sendir skrifstofu skóla- og frístundasviðs til samþykktar lista yfir þá nemendur sem óskað er eftir strætókorti/farmiðum fyrir.

2.2 Ef umsókn er synjað af skóla eða skrifstofu skóla- og frístundasviðs vegna þess að gönguleið telst of stutt getur foreldri óskað eftir mælingu hjá Landupplýsingadeild á

umhverfis- og skipulagssviði Reykjavíkur, sjá nánar um meðferð umsókna sem er synjað í 5. gr.

3. gr. Afhending strætókorta/farmiða

Skólastjóri hvers skóla ber ábyrgð á afhendingu strætókorta/farmiða. Endurnýjun á glötuðu korti er á kostnað viðkomandi nemenda/foreldra.

4. gr. Reglubundinn skólaakstur

4.1 Ef ekki er mögulegt að nota almenningssamgöngur til samræmis við gr. 1.1 er heimilt að koma á reglubundnum skólaakstri til lögboðinnar kennslu. Skólastjórar skulu senda tillögur sínar um reglubundinn skólaakstur til skrifstofu skóla- og frístundasviðs fyrir 1. maí vegna komandi skólaárs.

4.2 Ákvörðun um akstur með hópþingreiðum er tekin af skóla- og frístundaráði fyrir 1. júlí vegna komandi skólaárs. Skólastjóri ber ábyrgð á framkvæmd reglubundins skólaaksturs samkvæmt samþykktu skipulagi.

5. gr. Meðferð umsókna

Við meðferð umsókna skal farið að ákvæðum laga um grunnskóla nr. 91/2008, með síðari breytingum og stjórnarsýslulögum nr. 37/1993, með síðari breytingum.

Hafni skrifstofa skóla- og frístundasviðs umsókn um strætókort/farmiða skal það tilkynnt foreldrum skriflega þar sem fram komi ástæða synjunar. Foreldrar skulu vera upplýstir um kærurétt skv. 47. gr. laga um grunnskóla nr. 91/2008. Afrit niðurstöðu er sent viðkomandi skóla.

Með reglum þessum falla úr gildi reglur um afhendingu farmiða til nemenda í grunnskólum borgarinnar, samþykktar í Menntaráði 3. nóvember 2005.

Reglurnar taka gildi xxx 2019.

Reglur um skólahverfi, umsókn og innritun í grunnskóla Reykjavíkurborgar

Gildissvið

Reglur þessar gilda um umsókn og innritun í grunnskóla Reykjavíkurborgar en öllum börnum, að jafnaði á aldrinum 6–16 ára, er skylt að sækja grunnskóla skv. lögum um grunnskóla nr. 91/2008 með síðari breytingum. Skv. sömu lögum er sveitarfélögum skylt að sjá til þess að skólaskyld börn sem eiga lögheimili í sveitarfélaginu, og börn sem hefur verið ráðstafað í fóstur til fósturforeldra, sem eiga lögheimili í sveitarfélaginu, njóti skólavistar eftir því sem nánar segir í grunnskólalögum. Foreldri er hér notað yfir þá sem fara með forsjá barns skv. barnalögum.

1. gr. Skólahverfi

Í Reykjavík eru 34 grunnskólar reknir af Reykjavíkurborg en borginni er skipt upp í 37 skólahverfi.

Skólahverfin má sjá eftir götum á heimasíðu skóla – og frístundasviðs Reykjavíkur: <http://reykjavik.is/allir-grunnskolar> með því að velja borgarhluta og síðan grunnskóla. Einnig er hægt að sjá skólahverfin myndrænt með því að nota borgarvefsjá Reykjavíkurborgar: <http://borgarvefsja.reykjavik.is/borgarvefsja/> með því að velja *opna valglugga* – *Borgarskipting* og haka í *Grunnskólahverfi*.

2. gr. Umsókn í grunnskóla Reykjavíkurborgar

Umsókn um grunnskóla Reykjavíkurborgar fer fram í gegnum Rafræna Reykjavík, þjónustuvef Reykjavíkurborgar. Leiðbeiningar um skráningu í Rafræna Reykjavík er að finna á heimasíðunni www.reykjavik.is.

Hægt er að fá aðstoð við að fylla út rafræna umsókn á öllum þjónustumiðstöðvum borgarinnar og í Þjónustuveri Reykjavíkurborgar, Borgartúni 12-14, sími: 411 1111.

3. gr. Val um grunnskóla og meðferð umsókna

3.1 Foreldrar eiga kost á að sækja um skóla fyrir börn sín hvar sem er í borginni skv. reglum þessum.

3.2 Nemendur með lögheimili í tilteknu skólahverfi eiga afdráttarlausan rétt á skólavist í hverfisskóla og því forgang, ef skóli þarf að takmarka nemendafjölda.

3.3 Skóli tekur inn nemendur utan skólahverfis nema húsnæði hamli eða aðrar lögmætar ástæður.

3.4 Við meðferð umsókna skal farið að ákvæðum laga um grunnskóla nr. 91/2008 og stjórnarsýslulögum nr. 37/1993.

3.5 Hafni grunnskóli inntöku nemenda þar sem húsnæði hamlar skal skólustjóri tilkynna foreldrum það skriflega þar sem fram komi ástæða synjunar. Foreldrar skulu vera upplýstir um kærurétt skv. 47. gr. grunnskólalaga.

3.6 Hafni grunnskóli inntöku nemenda af öðrum lögmætum ástæðum en að húsnæði hamli inntöku, skal skólustjóri gefa foreldrum kost á að tjá sig um fyrirhugaða synjun. Andmæli foreldra skulu berast skólanum skriflega innan tveggja vikna.

Sé ákvörðun tekin um synjun umsóknar, að loknu mati á athugasemdum frá foreldrum, skal skólustjóri tilkynna það í bréfi til foreldra. Ákvörðun skal vera rökstudd og foreldrar upplýstir um kærurétt skv. 47. gr. grunnskólalaga. Afgreiðsla umsókna skal vera lokið innan mánaðar

frá því að umsókn berst til skólans. Ef fyrirsjáanlegt er að afgreiðsla umsóknar muni tefjast upplýsir skólastjóri foreldra um ástæður tafanna og hvenær afgreiðslu er að vænta.

3.7 Nemendur sem sækja skóla í öðru skólahverfi en lögheimili þeirra er, eiga sama rétt til skólavistar og þjónustu og nemendur úr skólahverfi skólans.

4. gr. Umsókn og innritun nemenda í 1. bekk grunnskóla

Tilkynning um hvenær hægt er að skrá nemendur í 1. bekk grunnskóla er send foreldrum í byrjun árs. Skráning fer fram í Rafræna Reykjavík og ef sótt er um hverfissskóla nemanda berst staðfesting um skráningu í skólann strax. Ef sótt er um annan skóla en hverfissskóla er umsókn afgreidd þegar fyrir liggur fjöldi nemenda sem hefur lögheimili í viðkomandi skólahverfi og hefur valið skólann. Um meðferð umsókna fer skv. 3. gr. þessara reglna.

5. gr. Flutningur milli skóla Reykjavíkurborgar

Foreldrar sækja um flutning á milli skóla í Rafrænni Reykjavík. Skóli sem sótt er um samþykkir eða synjar umsókn til samræmis við 3. gr. þessara reglna.

6. gr. Skólaakstur/strætófargjald

Þeir nemendur með lögheimili í Reykjavík sem eiga rétt á skólaakstri/strætófargjaldi eru: Nemendur í 1.-5. bekk sem búa meira en 1,5 km göngufjarlægð frá hverfissskóla sínum. Nemendur í 6.-10. bekk sem búa meira en 2 km göngufjarlægð frá hverfissskóla sínum.

7. gr. Nemendur með lögheimili í öðrum sveitarfélögum

Óski foreldrar nemanda með lögheimili utan Reykjavíkur eftir að nemandinn sækir grunnskóla í Reykjavík er farið með beiðnina í samræmi við viðmiðunarreglur Sambands íslenskra sveitarfélaga þar um.

8. gr. Upplýsingagjöf skóla- og frístundasviðs

Í kynningarefni og á heimasíðu skóla- og frístundasviðs skal koma skýrt fram að foreldrar nemenda hafi val um grunnskóla með þeim fyrirvörum sem um getur í 3. gr. og vakin athygli á því að unnt sé að velja sjálfstætt rekna grunnskóla.

Reglur þessar taka gildi frá 9. febrúar 2017. Frá sama tíma falla úr gildi reglur um skólahverfi og innritun í grunnskóla Reykjavíkur sem samþykktar voru í menntaráði þann 3. mars 2005.

Samþykkt í skóla- og frístundaráði þann 8. febrúar 2017 og í borgarráði þann 9. febrúar 2017.



REGLUR

um afhendingu farmiða til nemenda í grunnskólum borgarinnar með strætisvögnum Reykjavíkur og akstur nemenda með hóp bifreiðum

1. gr.

Nemendur sem sækja skóla í sínu skólahverfi eiga þess kost að fá ókeypis farmiða sé vegalengdin frá heimili að skóla meiri en 1,5 km fyrir nemendur í 1.-5. bekk og 2 km fyrir nemendur í 6.-10. bekk. Miðað er við skemmstu gönguleið. Nemendur sem að tilstuðlan Menntasviðs sækja skóla utan hverfis eiga þess einnig kost að fá ókeypis farmiða og skulu viðmiðunarmörk um vegalengd vera hin sömu.

2. gr.

Nemendur sem að eigin ósk sækja skóla utan síns hverfis eiga ekki rétt á ókeypis farmiðum. Þó er heimilt að afhenda þeim nemendum, sem flust hafa milli skólahverfa, en óska eftir að sækja sinn fyrri skóla út yfirstandandi skólaár, ókeypis farmiða að hálfu.

3. gr.

Þurfi nemendur að sækja lögboðna kennslu utan skólahverfis skal afhenda þeim ókeypis farmiða ef vegalengdin er meiri en 1,5 km fyrir nemendur í 1.-5. bekk og 2 km fyrir nemendur í 6.-10. bekk. Ef ekki er mögulegt að nota almenningssamgöngur við þessar aðstæður skal koma á reglubundnum skólaakstri.

4. gr.

Heimilt er að koma á reglubundnum skólaakstri til lögboðinnar kennslu utan skólahverfis verði því ekki við komið að nota almenningssvagna, m.a. vegna stundaskrárgerðar. Einnig skal nemendum ekið með hóp bifreiðum þurfi þeir á leið sinni til að sækja lögboðna kennslu utan skólahverfis, að fara yfir fjögurra akreina götur þar sem umferðarþungi er mikill og engar sérstakar ráðstafanir eru gerðar til þess að hindra umferðarhraða og/eða aðstoða gangandi vegfarendur.

5. gr.

Skólastjóri hvers skóla ber ábyrgð á afhendingu farmiða. Hann skal sjá til þess að nafnalisti um afhendinguna berist til Menntasviðs með hverjum reikningi frá Strætó bs.

6. gr.

Skólastjórar skulu senda tillögur sínar um reglubundinn skólaakstur til Menntasviðs fyrir 15. ágúst vegna komandi skólaárs. Ákvörðun um akstur með hóp bifreiðum skal tekin í samráði viðkomandi skólastjóra og Menntasviðs. Skólastjóri ber ábyrgð á framkvæmd reglubundins skólaaksturs samkvæmt samþykktu skipulagi.

Á fundi menntaráðs 3. nóvember 2005 var samþykkt að heimila Menntasviði að gera undanþágu um vegalengd þar sem um mjög erfiðar gönguleiðir er að ræða, svo sem þungar umferðargötur, bersvæði og illa lýstar leiðir.

Umsögn Skólaráðs Kelduskóla um Reglur um strætókort til nemenda í grunnskólum Reykjavíkur. Samþykkt á skólaráðsfundi 19. ágúst 2019.

Mættir: Árný Inga Pálsdóttir, skólastjóri, Ásta Hreinsdóttir fulltrúi foreldra, Elín G. Heiðmundsdóttir fulltrúi starfsmanna, Eldar Daníelsson, fulltrúi nemenda, Eydís Birta Aðalsteinsdóttir, fulltrúi nemenda, Eva Vilhjálmsdóttir, fulltrúi kennara, Kristjana Erlen Jóhannsdóttir fulltrúi foreldra, Sævar Reykjalin varamaður Bryndísar Axelsdóttur formanns Foreldrafélags Kelduskóla, fulltrúi grenndarsamfélags og Puríður Ágústsdóttir, fulltrúi kennara.

Umsögn

Skólaráð Kelduskóla telur nauðsynlegt að halda uppi skólaakstri fyrir nemendur Kelduskóla sem búa í Staðarhverfi og sækja skóla í Kelduskóla Vík, sjá grein 4 í reglum um strætókort til nemenda.

Rökstuðningur:

Það er ekki er mögulegt að nota beintengdan strætó, almenningsamgöngur fyrir nemendur Kelduskóla sem búa í Staðarhverfi yfir í Víkurhverfi. Sjá gögn í skýrslu frá starfshópi um Framtíðarskipulag skóla og frístundastarfs í norðanverðum Grafarvogi í júní 2019.

Bent er á að það eru nemendur frá 2. -10. bekk sem nýta skólaaksturinn.

Einnig er bent á að ekki eru öruggar göngu-eða hjólaleiðir á milli Staðarhervfis og Víkurhverfis. Frá stofnun Kelduskóla 1. janúar 2012 hafa ekki verið gerðar úrbætur í samgönguleiðum hjólandi né gangandi á milli þessara hverfa.

Nemendur Kelduskóla eru hvattir til að nota virkan ferðamáta til og frá skóla og eru þeir duglegir að ganga, hjóla og nýta skólaakstur til og frá skóla. Það eykur tvímælaust umferðaröryggi við skólann.

Melaskóla, 18.8.2019

Umsögn frá skólaráði Melaskóla varðandi nýjar reglur um afhendingu strætókorta til nemenda í grunnskólum Reykjavíkur.

Aðdragandi

Á fundi skólaráðs Melaskóla, þann 15.8. 2019, var tekið fyrir erindi frá skóla- og frístundasviði (SFS) þar sem óskað er eftir umsögn skólaráðsins um drög að nýjum reglum um afhendingu strætókorta til nemenda í grunnskólum borgarinnar. Upphaflega var erindi þetta sent Melaskóla bréflaga 1. febrúar sl. en síðan ítrekað með tölvupósti 23.4.2019. Skólastjóri Melaskóla harmar þessa töf á afgreiðslu málsins og þakkar fyrir viðbótarfrest sem fékkst til að skila inn umsögn skólaráðsins. Ekki er vitað með fullu hvernig stóð á því að skólaráðið tók málið ekki fyrir fyrr en skólastjóri axlar ábyrgðina af því.

Efnisatriði málsins

Tillagan sem var samþykkt af skóla- og frístundaráði 25. júní sl. og vísað í framhaldinu til borgarráðs, gengur út á það í meginatriðum að hætta skólaakstri í Skerjafjörð en bjóða nemendum Melaskóla sem þar búa, strætókort í staðinn, þeim að kostnaðarlausu. Með þessu sparast um 8 milljónir. Að öðru leyti er vísað í gögn málsins þar sem fjallað er um afhendingu strætókorta, hverjir eigi að fá þau og hverjir ekki, mikilvægi þess að börn og unglingar noti strætó meira og síðast en ekki síst nauðsyn þess að nemendur í grunnskólum Reykjavíkur sitji við sama borð.

Eftirfarandi viðbótarupplýsingar bárust fyrir fund skólaráðsins: SFS hefur í skoðun nokkurs konar mótvægisáðgerðir vegna erfiðra aðstæðna á gönguleiðinni frá stoppistöðinni á Suðurgötu. Annars vegar að leið 12 beygi inn Brynjólfs götu (hjá Vigdísarhúsi) og stoppi við Hagatorg, framan við Hótel Sögu, og þaðan fái nemendur fylgd í skólann. Og hins vegar, ef svo ólíklega vildi til að Strætó bs. samþykkti ekki þessa breytingu á leið 12, að fylgdin yrði frá stoppistöðinni á Suðurgötu. Þessar hugmyndir voru kynntar foreldrum og með þeim hætti að fylgdin yrði fullnægjandi, þ.e. fylgdarmaðurinn færi fleiri en eina ferð þar sem nemendur koma ekki endilega allir með sama vagninum. Væntanlega yrði um fleiri en einn aðila að ræða sem annaðist þessa fylgd.

Hér verður ekki gerður greinarmunur á Litla- og Stóra-Skerjafirði. Skv. breytingunum er gert ráð fyrir að nemendur úr Litla-Skerjafirði gangi í Melaskóla enda eigi þeir heima í innan við 1,5 km fjarlægð frá skólanum. Í umsögn skólaráðs Melaskóla verður hér eftir bara talað um Skerjafjörð vegna þess að skólaakstur í Stóra-Skerjafjörð nýttist augljóslega líka fyrir Litla-Skerjafjörð þar sem hann er í leiðinni.

Samtal við foreldra

Fyrir fundinn þann 15.8. sl. hafði ráðið boðið foreldrum nemenda sem búsettir eru í Skerjafirði, að koma á framfæri viðhorfum sínum til þessara breytinga. Um 30 foreldrar mættu á fundinn sem stóð í klukkutíma. Einnig mætti starfsmaður SFS undir lokin og svaraði spurningum fundarmanna. Auk þessara foreldra sem mættu á fundinn hafa all nokkrir sent skólastjóra bréf vegna þessara fyrirhuguðu breytinga. Af þeim foreldrum sem hafa þannig tjáð vilja sinn um málið við skólaráð og skólastjóra er um að ræða einróma andstöðu við þá fyrirætlan að hætta skólaakstri úr Skerjafirði. Foreldrar hafa lýst þungum áhyggjum af öryggi barna sinna og í raun reiði yfir því að ekki sé tekið tillit til ungs aldurs þeirra sem nýta skólaaksturinn í dag. Ljóst er að breyting þessi verður ekki í neinni sátt við foreldra í Skerjafirði heldur þvert á móti.

Umsögn skólaráðs Melaskóla

Að loknum fundinum með foreldrunum fundaði skólaráðið um málið og gefur eftirfarandi umsögn:

Skólaráð Melaskóla tekur undir margar athugasemdir foreldra og deilir áhyggjum þeirra. Skólaráðið leggst því alfarið gegn þeirri tillögu að skólaakstri í Skerjafjörð verði hætt. Nokkur rök eru fyrir þessari afstöðu sem nú verður gerð grein fyrir:

1. Hverfið Skerjafjörður hefur nær algjöra sérstöðu innan Reykjavíkur sökum fjarlægðar frá skólum og annarri þjónustu. Einungis Kjalarnes fellur í sama flokk hvað það varðar. Að auki er óhætt að segja að almenningsamgöngur að þjónustustofnunum þeim sem íbúum Skerjafjarðar er ætlað að sækja, séu ekki greiðar. Skólaráðið lítur svo á að skólaakstur sé forsenda þess að Skerjafjörður sé hluti af skólahverfi Melaskóla.
2. Strætó hentar ekki yngstu nemendum, 5 til 7 ára og jafnvel ekki 8 og 9 ára heldur. Börn á þessum aldri hafa tæplega þroska til að geta nýtt sér almenningsamgöngur með þessum hætti, án eftirlits eða aðstoðar. Öryggi barnanna er ekki tryggt með ásættanlegum hætti í strætó ef þau hafa ekki fylgdarmann með sér. Öryggisbelti eru ekki í strætisvögnum og ekki víst að börnin fái sæti.
3. Þá stoppar strætó, leið 12, langt frá Melaskóla. Næsta stoppistöð er á Suðurgötu sem líta má á sem hættulega umferðargötu. Þar hafa orðið banaslys á gangandi vegfarendum og hefur verið rifjað upp að skólaakstur var tekinn upp í kjölfarið á einu slíku hörmulegu slysi.
4. Gönguleiðin frá Suðurgötu, eftir Brynjólfsgötu og meðfram Háskólabíó eða Hótel Sögu getur verið erfið og óörugg. Núna er hún ógreið vegna framkvæmda en þess utan er þetta ekki ákjósanleg gönguleið þar sem margar opnanir eru af henni inná bílastæði Hótel Sögu og Háskólabíós/Vigdísarhúss. Í myrkri vetrarmánaðanna er eiginlega óskiljanlegt að láta sér detta í hug að ætla sex ára börnum að ganga þarna í skólann án fylgdar, eins og upphaflegar hugmyndir gerðu ráð fyrir. Fylgd myndi auðvitað vera nauðsynleg þarna.
5. Þær mótvægisáðgerðir sem hefur verið varpað fram, um fylgdarmann frá Suðurgötu eða að leið 12 stoppi hjá Hagatorgi og nemendur fái fylgd þaðan, duga þó ekki að mati skólaráðs, til að slá á áhyggjur af öryggi barnanna á þessari leið þeirra í skólann. Hugmyndin um fylgd er auðvitað góðra gjalda verð en í framkvæmd getur hún orðið nokkuð flókin.
6. Skólaráð Melaskóla fagnar því hins vegar að nemendur fái strætókort (en að skólaakstri verði samt haldið áfram) og hvetur borgaryfirvöld til að hlutast til um að strætó sem er að stærstum hluta í eigu borgarinnar, skipuleggi strætóleiðir sem nýtast börnum í Skerjafirði. Þá þyrfti strætó að ganga á milli Skerjafjarðar og inni Vesturbæ, t.d. að Melaskóla, Vesturbæjarlaug og Frostaskjólí.

Tvær ábendingar

- Nauðsynlegt er að funda sérstaklega með foreldrum í Skerjafirði og að pólitísk forysta borgarinnar mæti þar og eigi samtal við foreldrana.
- Rætt er um jafnræði milli hverfa borgarinnar varðandi skólaaksturinn. Skólaráð Melaskóla vill í því sambandi benda borgaryfirvöldum á að ekki dugi að nota þau rök bara þegar hentar. Þegar gengið er um skólalóð Melaskóla og húsnæðið skoðað og borið saman við ýmsa aðra skóla í öðrum hverfum borgarinnar, þá er ljóst að ójafnræðið þar á milli er himinhrópandi.

Samantekt og lokaorð

Skólaráð Melaskóla mælir gegn því að skólaakstri úr Skerjafirði verði hætt, fyrst og fremst af þeirri ástæðu að skólaaksturinn er forsenda þess að hverfið sé yfirhöfuð hluti af skólahverfi Melaskóla. En

einnig vegna þess að yngstu börnin hafa ekki þroska til að nýta sér almenningsamgöngur með þessum hætti, eftirlits- og fylgdarlaus.

Þá fer skólaráðið fram á að borgaryfirvöld taki nú þegar upp samtal við foreldra í Skerjafirði um þau mál sem hér hafa verið reifuð þannig að ákvarðanir um þetta séu teknar í sátt við íbúana í hverfinu, að raddir þeirra fái að heyrast og börnin njóti vafans þó það þýði að ekki takist ná nokkurra milljóna hagræðingu um sinn.

Að lokum lýsir skólaráðið yfir vilja sínum og skólastjórnar Melaskóla til að vinna áfram að þessu máli í samvinnu við fræðslufyrirvöld og foreldrasamfélagið, í því skyni að auk nýta fjármuni sem best án þess þó að fórna í neinu mestu hagsmununum fyrir minni: öryggi, velferð og menntun nemenda skólans.

Skólaráð Melaskóla

Fyrir hönd ráðsins,

Björgvin Þór Þórhallsson

Björgvin Þór Þórhallsson

skólastjóri

